

明者舊傳

貴陽府志
二十七

卷二十七

貴陽府志

卷二十七

PDG

貴陽府志卷七十三

知貴陽府事泰和周作楫蒙巖軒

知貴陽府事博白朱德璣綬堂刊

明耆舊傳一

貴陽耆舊之祀於鄉者明自越昇而下四十二人我朝自潘馴而下十七人共五十九人舊記襲貴州通志之例採王訓以下百一人之行實都爲一卷命曰鄉賢其餘則以類區別曰忠烈曰孝義曰仕績曰文學曰隱逸而殿之以方技夫入祠之士大夫於諸類無不賅而諸類之外又別無所謂鄉賢以此區曰似

有未協况鄉賢之目必請於

朝得

△前古而後敢稱未及請而遽稱之則誣必以及請與未
及請強爲辨別則未及請之中德行不減於及請者
徃徃而有俎豆旣弗之及紀載者又以拘牽而失之
奚足以服前哲之心哉今惟採摭事實多者列於前
但從舊史之例以姓標篇而不著鄉賢之目其事實
少者則從類列而鄉賢之崇祀也典禮所關別記之
於祠祀篇中使有可稽云舊記於明前著尹珍傳寶
尹貢侯馥謝恕趙國珍應世叔諸人今以華陽國志

稽之珍毋歛人寶平夷人貢夜郎人咸非今貴陽地
恕亦毋歛人曾守牂柯已採八功績錄國珍別八士
司載記而馥則江陽人世叔即奉之字非別有人乃
汝南人尤與牂柯無關今皆削之而斷自明始

明王詹范傳第一

王訓貴州宣慰司人性慷慨軀幹雄偉知兵有權畧
博覽羣籍喜論古今成敗之所由兼工詩古文詞年
十八上保邊要政策八篇宣宗嘉之多采用其說策
舊記不傳旋中宣德十年鄉試正統初吳亮鎮貴州
薦其材於朝授訓導教諸生嚴整有法十三年麓川

蠻叛尙書王驥討之辟訓軍中贊理機務明年驥還
貴州苗獠反圍新添諸衛朝廷命侯璉總督貴州軍
務討賊璉復辟訓幕府多所謀畫賊平論功升教授
後以子貴封武畧將軍卒年八十訓詩文有氣骨今
存者惟詩三首月潭記嘉瓜頌各一首錄八文徵

詹英字秀實貴州宣慰司人幼有宿慧書不再讀過
日成誦稍長負氣節敦行誼究心當世之務恒以古
人自斯爲諸生時巡按某甚器之每召見必款語移
時嘗歎爲非經生流年十七舉正統三年鄉試三應
禮部試不第時論惜之久之授會川衛訓導先是麓

川宣慰使思任發叛黔國公沐晟都督方政討之不克廷議多謂麓川遠蠻不必用兵王振方用事欲示威蠻方力請大發兵討之兵部尚書王驥與振議合朝廷遂命驥督蔣貴軍起東南兵十五萬窮其巢穴軍至麓川思任發遁僅焚其寨而還振主其事以功論驥封靖遠伯已而思任發走緬甸緬甸挾之要地帝不許詔驥再征麓川且圖緬甸思任發仍不可得驥還再加歲祿三百石已而緬甸獻思任發十三年其子思機發思卜發據孟養大爲邊患雲南騷動復命驥督官聚張軌田禮軍十三萬征之踰孟善至孟

那貴州都指揮洛宣九谿衛指揮翟亨戰死思機發
思卜發咸道不知所之英因上疏言邊務十三事又
言靖遠伯王驥都督宮聚等奉命征蠻不體上心惟
縱已欲行李至一二百扛役夫五六百人夾帶彩幣
等物密散土司責其厚償故違祖訓擅用閹刑以進
御爲名實留自用行師全無紀律大軍一十五萬俱
從一日起程蹂踐傷殘畧不憫惜其運糧不籌計每
人運米六斗力不堪舉有自縊而死者又假運糧爲
名派馬一千匹以供私用及臨賊境至金沙江邊攻
賊不克被賊殺死都指揮指揮等官却將江邊漁戶

解作俘馘因以班師又以邊地分與木邦孟邦掩敗
爲功昔唐南詔侵邊侍御史李宓將兵七萬擊之兵
敗楊國忠更以捷聞范祖禹論曰管子云君門遠於
萬里言壅蔽之深害也驥之此行何異於宓乞正驥
罪先遣廉幹官沿途盤校各官行李以謝天人之怒
以快士卒之心疏上帝下之法司王振左右之得不
問令英往參驥軍英恐爲驥所詭走詣闕自陳朝臣
爭識其面有欲薦於帝留爲臺諫者值有也先之變
事遂中止仍還會川考滿遷河西教諭景帝之初湖
貴有蠻擾四川爲其鄰境朝廷思得幹臣巡撫其地

英上疏薦侍郎張固景帝可其奏未幾辭官歸里其
卒也編修羅玘表其墓英工詩古文著有止庵集今
不存孫恩宏治十二年成進士官至大理寺副

范府字季修貴州宣慰司人父冠成化四年舉人官
國子監博士府中正德二年鄉試授巴縣教諭正德
五年保甯賊藍廷瑞鄂本恕起瀘州賊曹甫等應之
四川巡撫林俊擊破廷瑞本恕於通龍瀘河門鎮禽
其黨廖惠遂移師擊甫甫佯降而其弟琯劫掠如故
指揮李蔭斬之甫移寇江津結七營轉攻重慶後以
府知兵召入幕府叅預軍事後發酉陽播州土兵助

蔭用府計以元日掩破其四營賊遁人民家舉火焚之盡斃蔭遂乘勝搗老營去賊十五里甫以數十騎出遇蔭爲蔭所敗而走蔭乘勝圍之俘及焚死者二千有奇甫亦伏誅而本恕廷瑞等亦爲永順土官彭世麟所禽先是甫黨方四入貴州婺川龍泉進至烏江及甫誅復攻南川綦江以窺瀘州俊益發土兵令副使側珊李鉞等敗之賊且盡俊之調度府所贊畫居多論功升遂甯知縣獎善良鋤強梗民甚便之增修遂甯石城及學宮調度得宜民不勞而工就擢雅州知州州境有高繼恩之亂府率兵討平之升重慶

同知己致仕歸府知詩及其歸里也與鄉人立結溪
山詩社朝夕以唱和爲娛樂著有唐山詩集久之卒
於家川中吏民間之莫不哀泣

論曰王武畧季修以儒官忝戎幕卒有成功起爲
令守雖不獲大用以展其才猷要爲一世之英詹秀
實之効王驥也慷慨盡言名動當時真非經生流詰
闕自陳跡似詭秘然其時王振方用事王驥與之表
裏坐以軍事而殺之一反手耳徒死無益不可謂智
自陳而免何傷於明哲乎史言其匿不出則傳聞失
實之詞也

明秦徐劉傳第二

秦士昂原名同

仁宗廟諱上字敬避第載其字士昂貴州宣慰司人正統

七年成進士貴州之有進士自士昂始授行人遷禮部員外郎天順初奉使雲南問民疾苦歸歷疏其利弊於朝帝多採用疏舊記不存出爲雲南左參政鐵索箐賊起攻破旁近府州縣以十數士昂率兵襲而擒之都御史決死囚日有烏近萬飛集行院驅之不散士昂知其有寃言於都御史再鞠之果有無辜者二十九人咸釋之吏民皆感其仁罔不愛戴焉出巡

金齒渡潞江中流風濤大作舟中悉驚怖無色士昂
從容作口號云若有賊私并土物任教沈向潞江中
俄而風止濤息士昂卒得渡潞江人咸謂至誠所感
格後卒於官

徐節字時中貴州衛人父資別有傳節成化八年進
士授內鄉知縣治行最一方擢御史其去內鄉也民
庶遮道挽留衣履爲之裂損曲喻之乃得去在御史
任三上章劾錦衣衛指揮牛循屢劾萬安章今不存
出爲雲南右參政連破梁山竹箐諸賊米魯之亂節
率兵出擊有戰功正德元年自布政使遷右副都御

史巡撫山西復以剛直忤劉瑾爲瑾所中三年六月
削秩罷歸罰米三百石瑾誅乃復職已而致仕節爲
人頗曠達慕陶潛之所爲放遣在家自作挽歌行狀
以示門人卒年八十六賜祭葬著有蟬噪集今不存
節事具朱國楨大政記及省志

劉秉仁字子元貴陽人父恒嘉靖四年舉人官至府
同知以母老乞歸屢爲鄉飲賓後封如子官秉仁幼
有異操恒官國子學錄時秉仁隨恒在國子學祭酒
林澣有知人鑒一見卽以遠到期之稍長能文章有
聲譽嘉靖二十六年成進士授德興知縣縣有火災

風甚熾秉仁默禱謂百姓無罪願以已身代祝未畢而風反火滅人咸異之久之擢主事屢遷至工部郎中於工政多所釐正出爲參政累官右僉都御史撫治鄖陽俄以終養告歸家居二十五年始卒弟秉禮嘉靖三十一年舉人官至府同知秉仁昆弟三人其一逸其名咸有孝德事父極盡色養恒解陳情後母卒服闋卽不赴選家居者四十年及秉仁爲撫治亦不樂就養故秉仁莅治無幾卽乞歸養恒之卒也秉仁兄弟居喪哀毀幾至滅性時論稱其至孝恒居官有善政其歸也部人留之弗獲立碑以識去思舊記

不言恒所官地秉仁沒崇祀鄉賢秉仁之家居也好
交接賓客賢士大夫喜與之讌聚興國吳國倫官於
貴州世所稱七子者與秉仁游今甌瓠洞集中有元
夕同諸大夫讌劉子元中丞宅觀鐙卽其事也秉禮
子世官萬厯二十八年舉人官至知州

誦口士昂以公方利物時中以伉直觸姦使生上國
當入國史照耀寰區而方志輒以數語了之乃至其
章疏無一字流傳文獻之缺畧如是可歎也已子元
雖於當世無所著見然其純懿之行有大過人者膺
民社時又能以至誠感神夫豈易易哉

明陳湯二馬吳傳第三

陳文學字宗魯貴州宣慰司人年十餘卽能詩文以諸生事王守仁於龍場潛心理學守仁居夷集中有示陳宗魯詩卽文學也正德十二年舉於鄉累官耀州知州上官不知改簡宗魯不赴因告歸旋里杜門不預世事終日靜坐精究學業證以師說翛然自得暇則游藝畜晉唐真行善本甚多臨之往往逼其真對客則談詩論文以此終身年六十推星命者言其歲不利文學卽自爲五栗先生墓誌銘以待盡五栗其自號也後又十六年始卒初遭微疾客有來問者